

SAGIVM, seu Ciuitas Sagiorum eidem Notitiæ Imperij Romani, vulgò *Seëz*. Huius Episcopus *Pasius* subscripsit Concilio Aurelianensi secundo.

OXIMVM antiquo authori vitæ sanctæ Opportunæ apud Surium, vulgò *Hiesmes*, quibusdam ciuitas Episcopalis sub Rothomago ex hoc potissimum creditur, quod in singulis Sagiensi, Baiocēsi & Lexouienſi Episcopatibus singuli sint Archidiaconi, qui Oximēses dicti sedē huius nominis his tribus Episcopatibus diuisam fuisse, quasi videntur indicare. Huius forsan Episcopus fuit *Litaredus* Oxomensis dictus, qui subscripsit Conc. Aurelianensi 1. sed verisimilius ex ea sede fuit Liberalis Oximensis, cuius mentio fit in certo indiculo de quo mox dicemus.

PROVINCIA TVRONENSIS, SE V LVGDVNENSIS TERTIA.

CIVITAS TVRONORVM dictæ Notitiæ Galliæ, vulgò *Tours*. *Martinus* huius Episcopus interfuit Concilio Treuirensi, & *Gatianus* eiusdem primus Antistes dicitur apud Gregor. Turon. lib. 1. hist. Franc. cap. 30.

CIVITAS ANDICAVORVM eidem Notitiæ, vulgò *Angers*. *Talasius* huius Episcopus subscripsit Concilio Turonensi primo.

CENOMANORVM CIVITAS eidem Notitiæ Galliæ, vulgò *Le Mans*. *Victorius* huius Episcopus subscripsit Concilio Turonensi primo.

CIVITAS REDONVM eidem Notitiæ ciuitatum Galliæ, vulgò *Rénes*. *Athenius* huius Episcopus subscripsit Concilio Turonensi primo.

CIVITAS NAMNETVM eidem Notitiæ Prouinciarum Galliæ, vulgò *Nantes*. *Eusebius* huius Episcopus subscripsit Concilio Turonensi primo.

VENETIA *Cæsari* lib. 3. de Bello Gallico, vulgò *Vennes*. *Paternus* huius Episcopus ordinatus fuit in Concilio Venetico.

ALETVM Notitiæ Imperij Romani, vulgò *Alet*. *S. Maclouius* huius Episcopus ordinatus fuit anno Christi 541. vt in monumentis Ecclesiæ sancti Maclouij legitur. Translata autem fuit sedes Episcopalis Maclouium ciuitatē, quæ à sancto Maclouio nomen habet, anno 1140. à Ioanne Grilleo, qui ex Abbate Begardēsi Ordinis Cisterciensis, Episcopus Aletēsis factus fuerat.

Tres alias sedes Episcopales in Britannia Armorica nimirum, Briocum, Dolam, & Trecoram à multis sæculis extare certum est, sed harum institutio, vt verum fatear, ignoratur. Huius regionis historiæ sanctum Briocum vrbis cui nomen indidit primum Episcopum fuisse aiunt; & quidem tempore Conani Comitis sub finem quinti sæculi, vel initio sexti. In his etiam legere est Trecorensē sedem prius in Lexobia antiqua Ciuitate institutā, indeque, hac ab Hastano Danorum Rege diruta anno 836. Trecoram translatam fuisse; necnon Drenualum primum Lexobienſem Episcopum nominant, quem obiisse volunt anno Christi 92. Itemque Robertū Lexobienſem Episcopum subscripsisse sacræ Alani longi Regis Brittonum anno 683. quæ apud Argentreum extat. Quod autem ad Dolam spectat, Gregorius Turonensis lib. 10. Historiarum cap. 31. scribit Eustochium quintum Episcopum Turonensem apud Dolam, Ecclesiam instituisse. Nec pauci asserunt Sampsonē eius Præsulē fuisse, qui ex Eboraco in Anglia fugiens, inter Episcopos subscriptus legitur in Concilijs Galliæ, maximeque in Parisiensi anno 559. Ea